



REPUBLIKA E KOSOVËS - REPUBLIKA KOSOVO	
KOMUNA E VUSHTRRIË-OPŠTINA VUÇITRN	
01 Nr. / Br	119 / 24
Nr. i fq. / Br. st	- 17 -
Data / Datum	27. 06. 2024
VUSHTRRI - VUÇITRN	



REPUBLIKA E KOSOVËS

KUVENDI I KOMUNËS – VUSHTRRI

PROCESVERBAL
NGA MBLEDHJA E V E RREGULLT E KUVENDIT TË KOMUNËS SË
VUSHTRRIË, MBAJTUR MË 03 QËRSHOR, 2024

Mbledhja është mbajtur në sallën e Kuvendit të Komunës së Vushtrrisë, duke filluar në orën **10:20**. Në këtë mbledhje ishin të pranishëm anëtarët e Kuvendit të Komunës së Vushtrrisë:

Adnan Lahu, Agim Bregaj, Agron Përçuku, Ali Januzi, Arlind Gogolli, Basri Menxhiqi, Behar Duraku, Bekim Zabërgja, Blerina Shala, Bujar Pllana, Edona Gashi, Faton Hyseni, Gentiana Rama, Gresa Muli, Kushtrim Hyseni, Fakete Dushi, Fatmire Cecelia, Jeton Gjaka, Refik Maloku, Melihate Basholli-Latifi, Mensur Kasumi, Mensur Kastrati, Mentor Hasani, Mentor Ferizi, Nasuf Aliu, Nurie Halili, Nurten Çerkezi-Gjyshinca, Shkelzen Xhaferi, Sylejman Meholli, Ymer Haradinaj dhe Zojë Hajrizi.

Munguan: Mek Selaci, Alban Bajrami, Leonora Gërguri dhe Spasoje Stefanoviç.

Mbledhjen e hapi dhe e kryesoi Melihate Basholli-Latifi, Kryesuese e Kuvendit, e cila konstatoi se në sallë janë prezent 31 anëtarë të kuvendit, kuorum i mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Të pranishëm në këtë mbledhje ishin edhe Kryetari i komunës, z. Ferit Idrizi, nënkryetarja e komunës znj. Hava Rruka-Mlinku, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Kuvendi, në fillim të punimeve të mbledhjes së rregullt, nderoi me një minutë heshtej të ndjerin z. Agim Vatovci, për jetën dhe veprën e tij.

z. Mentor Ferizi, bazuar në vendimin e KQZ-së, para kuvendit dhe betimin duke u bërë anëtar i kuvendit me të drejta të plota.

Melihate Basholli-Latifi, kryesuese e kuvendit- në fillim të mbledhjes njoftoi kuvendin se pas konsultimeve që ka pasur me MAPL-në dhe zyrtarët kompetent komunalë, dhe me qëllim të heqjes së çdo dileme edhe për sa i takon votimit, propozoi të futet në rend të ditës Propozim – vendimi për pagesën e shujtave ditore, për zyrtarë të administratës së komunës.

Adnan Lahu, anëtar i kuvendit- duke iu adresuar Kuvendit dhe qytetarëve të Komunës së Vushtrrisë deklaroi: fillimisht dua t'i uroj drejtorët e ri për pozitat e reja dhe t'ju uroj punë të mbarë, por kam një pyetje për ta:

A e dini se për çfarë periudhe jeni emëruar në këto pozita, për disa ditë, për disa javë apo deri në rregullimin e rrugës Vushtri-Prishtinë?!

I nderuar kryetar, se nuk ju përgjigjeni kuvendit dhe anëtarëve të kuvendit e kemi parë, por ju nuk po i përgjigjeni as qytetarëve të Vushtrisë dhe as mediave. Ne këtu, në këtë foltore, shumë herë ju kemi pyetur se pse po ndodhin gjithë këto shkarkime në komunën tonë, çfarë po fshihet pas gjithë këtyre ndërrimeve, por ju kryetar asnjëherë nuk jeni përgjigjur. Po e cilësoni vetën si trajner të futbollit, duke thënë që lojtaret e dobët duhet të largohen nga fusha, por mos harroni që për lojë të dobët në fushë ndërrohet edhe trajneri, e siç po duket, komunës sonë pashmangshëm do t'i ndërrohet trajneri. E bëni komunën klub futbollit dhe harroni që Vushtrria ka me të vërtetë një klub të futbollit i cili po përballet me shumë vështirësi, por kjo nuk ju bënë përshtypje. U munduam të gjithë ta ngrisnim klubin tonë të zemrës dhe për një kohë shumë të shkurtër arritëm që ta sjellim klubin në barazh për Superligë, dhe tani erdhët ju Kryetar dhe e sollët klubin përsëri në një pozitë shumë të rëndë, ku as nuk kanë financa, as nuk kanë përkujdesje dhe as nuk kanë mundësi t'ju takojnë kurrë, sepse nuk i prisni. A keni ndonjë shpjegim kryetar?, po pyes për klubin e futbollit sepse për këtë klubin ku ju jeni trajner shpjegimin e marrim nga draft – raporti i Auditorit. Të dashur qytetar të Vushtrisë, janë hiç ma pak se 27 të gjetura në draft – raportin e auditorit të jashtëm, kjo është gjendja më e keqe e komunës sonë në tërë historinë e saj, në asnjë qeverisje të mëhershme nuk ka pasur kaq shumë të gjetura. Kryetar, nëse mendoni që me ndërrimin e drejtorëve mund ta justifikoni vetën e keni shumë gabim, sepse, mos harroni, se kur ekipi përformon dobët ndërrohet edhe trajneri. Kam edhe një çështje Kryetar, komuna jonë ka probleme me paga të punëtorëve të ndërmarrjes publike dhe me shumë gjasë punëtorët për shkak të planifikimit tuaj të dobët do të mbesin pa paga në muajt e fundit të vitit, ndërsa në anën tjetër ju shohim duke shpërndarë shujta, si i keni shpërndarë këto shujta Kryetar, vetëm për një muaj, apo do vazhdoni prapë t'i shpërndani edhe pse edhe këtu keni bërë dallime duke selektuar punëtorët dhe duke mos i përfshirë në shujta punëtorët e sigurimit dhe të pastrimit. A keni ndonjë shpjegim kryetar? Në fund tha se raporti i auditorit ka konstatuar më shumë 20 të gjetura, dhe kjo dëshmon më së mirë për gjendje se si po qeveriset në Vushtri. Po ashtu pyet se në çfarë forma janë paguar shujta për punëtorët e N.P.L. “Përparimi” sepse siç dihet kjo kompani gjendet në gjendje jo të mirë financiare, andaj kjo formë e ndarjes është përpos jo-gjithëpërfshirëse edhe vështirë e realizueshme, dhe si rezultat i keqplanifikimit me shumë gjasë punëtorët e kësaj kompanie në fund të vitit do të mbesin pa paga.

Ymer Haradinaj, anëtar i kuvendit-vlerësoi se muaji maj ka qenë i karakterizuar me ndryshime shumë të mëdha në qeverisjen lokale të Vushtrisë. Dhe për vetëm në nëntë drejtori komunale, në një periudhë më pak se tre vjeçare janë ndërruar 24 drejtorë dhe ushtruesë të detyrës, dhe në fund kemi edhe shkarkimin e nënkryetarit të komunës. Qytetarët dhe anëtarët e kuvendit janë tërësisht të painformuar për këto ndërrime kadrovike, dhe kjo çështje bënë që kryetari i komunës të shkel kreun e shtatë neni 51 të statutit të Komunës së Vushtrisë i cili thotë: *Kryetari i komunës njofton Kuvendin e komunës në rast të ndryshimit të emërtimit të ri të ndonjë drejtori apo drejtorie*. Prandaj kjo pikë e statutit nuk është duke u respektuar nga ana e kryetarit të komunës. Në vazhdim ai për të bërë të qartë para anëtarëve të kuvendit lexoj emrat e drejtorëve të dejetorive komunale të cialt janë ndërruar gjatë periudhës trevjeçare qeverisëse por edhe drejtorëve aktual. Në këtë konteskt ai vlerësoi se për këto ndryshime të shpeshta e të shumta qytetari i Vushtrisë është i shqetsuar se çfarë në fakt është duke ndodhur. Mamdje shtoi se mujin maj 2024 e kanë karakterizuar edhe vizitat e shumta të kryetarit të komunës jashtë vendit dhe pyeti se cila është natyra e këtyre vizitave dhe cialt janë përfitimet e komunës nga këto vizita.

Edona Gashi, anëtare e kuvendit- duke iu adresuar Kuvendit dhe qytetarëve të Komunës së Vushtrrisë deklaroi: Sot dua të trajtoj çështjen e kompanisë Speex e cila tashmë e sa vite operon në komunën tonë duke punësuar shumë të rinj e të reja. Me 26 Tetor 2021 kryetari Xhafer Tahiri pati nënshkruar marrëveshje për bashkëfinancimin e komunës (50% të shumës së paguar) për ndjekjen e kurseve në gjuhën Gjermane dhe Frënge në Speex, për 200 të rinj Vushtrrias. Qëllimi i këtij subvencionimi ishte punësimi i të rinjve dhe të rejave të qytetit dhe ne kishim besimin se do të ndihmonim qytetarët tanë të zhvillonin aftësitë e tyre. Pastaj, me 10 Mars 2023, kryetari Idrizi e vazhdoi po këtë kontratë, me 50% bashkëfinancim të cilën nuk po e përmbushë. Deri sot, nuk kemi parë rimbursime të premtuara dhe komuna po jep arsye të pabaza, si shtyrja e buxhetit, duke mashtruar qytetarët. Kjo situatë është e papranueshme dhe kërkojmë që të mbani përgjegjësi dhe të përmbushni premtimet dhe obligimet e juaja. Po ashtu, kërkoj nga kryetari që të na njoftoi lidhur me këtë marrëveshje, ku ka ngecur marrëveshja dhe pse të rinjtë nuk po e marrin rimbursimin e premtuar. Ne, kryetar, nuk e kemi plan të ndalemi dhe do të vazhdojmë të luftojmë për të drejtat e qytetarëve dhe për një qeverisje transparente të cilën ju nuk e keni e me të cilën edhe po krenoheni”.

Ferit Idrizi, kryetar i komunës-pasi i përshëndeti të pranishmit në adresimin e tij para kuvendit njoftoi mes të tjerash se sa i përket informimit për ndërrimin e drejtorëve komunal, nuk ka pasur hapësirë të njoftoj kuvendin sepse nuk pasur mbledhje të kuvendit që është mbajtur gjatë kësaj periudhe kohore. Në këtë kontekst shtoi se, atë që ka thënë para mediave mbetet prapa saj, sepse ka qenë kërkesë e këtyre drejtorëve që të lirohen nga detyra për shkak të angazhimeve tjera të tyre, dhe edhe pas këtyre ndryshimeve qeveria është duke vepruar normalisht pa ndonjë problem. Lidhur me draft-raportin e auditorit të përgjithshëm deklaroi se ai do të diskutohet në kuvend kur të finalizohet, dhe shtoi se ai që e ka publikuar këtë raport ka bërë shkelje, sepse në këtë stad nuk ka pasur të drejtë që ai të publikohet. Për këtë vlerësoi se është akoma herët të diskutohet kjo çështje, sepse edhe vitin e kaluar ka pasur të gjetur por pasi është plotësuar dhe është ndryshuar në aspektin pozitiv, si do që të jetë ky raport do të diskutohet në kuvend pasi që ai të finalizohet. Sa i përket klubit të futbollit, tha se ka mbështetur këtë klub prej se ka ardhur në krye të komunës dhe për këtë janë edhe dëshmitë, ky klub ka problemet e tij por shumë shpejt mendojmë se do ta ndihmojmë për ta ringjallur, përmes donatorëve, përkatësisht përmes të ardhurve nga tatimi në fitim i bizneseve që veç se këto biznese na kanë ofruar asistencën e tyre, në bazë të ligjit për sponsorë, ashtu siç është zgjidhur çështja me klubin e Hendbollit. Tutje lidhur me ndarjen e shujtave për punëtorët e Ndërmarrjes Përparimi ceku se janë tri kategori, dhe kjo ka ndodhur për t’i stimuluar këta punëtorë të vyer, pasi që komuna i ka dhënë shërbime kësaj kompanie, duke zgjeruar gamen e shërbimeve sepse kësaj kompanie i janë dhënë edhe mirëmbajtja e ndriçimit publik. Lidhur me vizitat jashtë shtetit, njoftoi se të gjitha vizitat kanë qenë zyrtare me karakter pune me theks për të hulumtuar investitor. Vizita në Malin e Zi, ka qenë sepse komuna jonë është bërë pjesë e Unionit të Komunave Shqiptare me seli në Tiranë. Vizita në Gjermani është bërë me dy asamblastët e kuvendit z. Agron Përçuku dhe z. Arlind Gogolli, ka qenë një vizitë e frytshme dhe e suksesshme, takimi ka qenë me një kompani Kosovare në Gjermani, e cila prodhon dyer kundër zjarrit dhe e njëjta ka aplikuar për leje në Komunën e Vushtrrisë, për hapjen e një fabrike të tillë në Komunën e Vushtrrisë që përfshinë investime në vlerë prej 5 milion euro. Lidhur me pyetjen e anëtares së kuvendit znj. Gashi, për subvencionet për Speex, njoftoi se është shqetësim i bazuar, por me të hyrat e bartura të cilat akoma nuk janë lëshuar mendon se me të njëjtat do të mbulohen këto obligime të cilat i kemi marr mbi vete, më këtë rast jemi duke i paguar edhe 11 profile profesionale me qendër në Mitrovicë, të cilat janë të kërkuara nga ana e tregut. Në fund tha se, ky vit është ndër vitet më sfiduese në aspektin financiar, por beson se edhe me ndihmën e donacioneve nga ana e disa ministrive do të mbulohet deficitin financiar i Komunës së Vushtrrisë.

Adnan Lahu, anëtar i kuvendit-tha se, konstatimi i kryetarit të komunës, se nuk ka pasur mbledhje të kuvendit për të njoftuar për ndërrimin e drejtorëve komunal, është i paqëndrueshëm, sepse ndërrime ka pasur edhe më herët por asnjëherë nuk pasur njoftim për kuvend dhe opinionin publik, ndërsa në media kryetari ka dhënë një sqarim se drejtoresha e Urbanizmit është liruar nga pozita për shkak të udhëtimit, gjë e cila është e pa vërtetë, sepse kjo e fundit është zyrtare në DUMM në Vushtrri dhe e njëjta udhëton nga Prishtina në Vushtrri. Lidhur me ndihmën e klubit të futbollit, sqaroi opinionin se ka qenë premtim që nga ardhja në pushtet e kryetarit për ofrimin e 30% nga subvencionet nga bizneset, por edhe pas tri viteve nuk ka asnjë përmbushje të këtij premtimi dhe në ndërkohë klubi është duke shkuar drejt shkatërrimit në aspektin financiar. Ndarja e shujtave për punëtorët e Përparimit është dashur ose të bëhet për të gjithë ose nuk është dashur të bëhen dallime. Në fund lidhur me sfidat me limitet buxhetore vlerësoi se nuk kemi të bëjmë me sfida buxhetore por me keqmenaxhim dhe keqshfrytëzim të buxhetit të komunës. Krejt në fund pyeti se kush është drejtor i Drejtorisë së Prokurimit Publik.

Ymer Haradinaj, anëtar i kuvendit-tha se, kryetari i komunës prap bëri shkelje të statutit të komunës, duke mos në treguar se kush janë drejtorët e drejtorive komunale që i ka emëruar. Andaj kërkoj nga kryetari i komunës që ndryshimet në drejtoritë komunale që i ka bërë, të njoftoi emër për emër.

Ferit Idrizi, kryetar i komunës-sqaroi se statuti i komunës nuk përcakton se si të njoftohet kuvend, sepse emërimi i drejtorëve është kompetencë e kryetarit të komunës dhe me që është kështu ai do të njoftoi kuvendin me shkrim, për të gjitha ndryshimet që janë bërë në drejtoritë komunale. Lidhur me Drejtorinë e Urbanizmit ceku se z. Nexhat Merovci, nuk është në asnjë strukturë të PDK-së dhe i njëjti është UD i drejtorit, sepse kjo drejtori do t'i takoj ashtu siç ka qenë shoqërisë civile.

Mentor Ferizi, anëtar i kuvendit-kërkoj që të mos keqinformohet opinioni publik, lidhur me gjendjen financiare të kompanisë “Përparimi”, për faktin se ajo është në gjendje stabile dhe ndodhet në fazën e realizimit të disa investimeve kapitale. Prandaj nuk do të ketë kurrfarë problemi me realizimin e pagave për punëtorët e saj.

Sylejman Mehulli, anëtar i kuvendit-pasi i përshëndeti gjithë të pranishmit në adresimin e tij lidhur me rendin e ditës, shtoi se kryetari i komunës edhe disa praktika që kanë qenë pozitive në kuvend ka fillua t'i anashkaloj, kjo për faktin se pika lidhur me dekorata për nder të 17 qershorit ditës së çlirimit, e ka proceduar pa përfillur KPF-në dhe në kundërshtim me statutin dhe rregulloren e kuvendit dhe rregulloren për ndarjen e dekoratave. Ai vlerësoi se askujt nuk i bën nder të ndahen titujt më të lartë në komunë, duke shkelur procedurat ligjore duke mos i kaluar nëpër KPF, sepse zakonisht për këto pika ka pasur njëfarë uniteti politik për të nderuar figurat e dalluara të qytetit tonë. Lidhur me çështjen e shujtave për punëtorët e administratës së komunës tha se nuk është në rregull që ky vendim të qëndroj për tre apo katër muaj në sirtar, pa marr një epilog kjo çështje as nga MAPL e as nga kryesuesja e kuvendit, pavarësisht të gjitha këtyre këtë çështje ata do ta përkrahin.

Në vazhdim, kuvendi me 25 vota “për” sa ishin edhe prezent në sallën e mbledhjes, vendosi që të inkorporohet në rendin e ditës për shqyrtim Propozim – vendimi për pagesën e shujtave ditore për zyrtarë të administratës së komunës.

Në fund të debatit, jashtë rendit të ditës dhe për rendin e ditës, Kuvendi pas votimit me vota “unanime” aprovoi këtë:

R E N D D I T E

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 25 prill 2024.
2. Shqyrtimi dhe aprovimi i Propozim – vendimit për miratimin e propozimit të Kryetarit të Komunës, për këmbimin e pronës së paluajtshme komunale me pronën private, për rregullimin e kanalizimit në Rr. “Enver Musa” në Vushtri.
3. Shqyrtimi dhe aprovimi i Propozim – vendimit për ndarjen e mirënjohjeve dhe dekoratave për nder të 17 qershorit, ditës së çlirimit.
4. Shqyrtimi i Raportit vjetor për punën e Ndërmarrjes Regjionale të Mbeturinave KRM “Uniteti”, për vitin 2024.
5. Shqyrtimi dhe aprovimi i kërkesës së Shoqatës së Familjeve të Dëshmorëve të UÇK-së, dega në Vushtri.
6. Shqyrtimi dhe aprovimi i Propozim – vendimit për formimin e komisionit për shqyrtimin e ankesave lidhur me dhënien e pronës komunale në shfrytëzim.
7. Shqyrtimi dhe aprovimi i Propozim – vendimit për pagesën e shujtave ditore për zyrtarë të administratës së komunës.
8. Shqyrtimi i Informatës lidhur me Qarkoren Buxhetore Nr.01/2025.
9. Pyetje dhe përgjigje.

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 25 prill 2024.

Pas shqyrtimit të kësaj pike të rendit të ditës, Kuvendi me vota “unanime”, aprovoi procesverbalin nga mbledhja rregullt e Kuvendit të Komunës së Vushtrrisë, mbajtur më datën 25 prill 2024.

2. Shqyrtimi dhe aprovimi i Propozim – vendimit për miratimin e propozimit të Kryetarit të Komunës për këmbimin e pronës së paluajtshme komunale me pronën private, për rregullimin e kanalizimit në Rr. “Enver Musa” në Vushtri;

Pas shqyrtimit të kësaj pike të rendit të ditës, Kuvendi pas votimit me 20 vota “për”, vendosi me sa vijon:

1. Miratohet propozimi i kryetarit të Komunës për këmbimin e pronës së paluajtshme komunale me pronën e paluajtshme në pronësi të Bekim, Kadri, Ferki dhe Isak Krasniqi, në pjesë ideale prej $\frac{1}{4}$.

2. Pronat e paluajtshme që do të këmbehen kanë këto karakteristika: pjesë nga parcela kadastrale P-70202016-01121-1, në sipërfaqe prej 65 m^2 , nga sipërfaqja e përgjithshme prej 7074 m^2 ZK Vushtri, pronë e Komunës së Vushtrrisë, me pjesën e parcelës kadastrale P-70202016-00939-2, në sipërfaqe prej 65 m^2 , nga sipërfaqja e përgjithshme prej 238 m^2 ZK Vushtri, pronë e Bekim, Kadri, Ferki dhe Isak Krasniqi, me pjesë ideale $\frac{1}{4}$.

3. Këmbimi i pronës së paluajtshme është bërë pasi që nuk ekzistojnë parcela të tjera komunale të përshtatshme për zgjerimin e rrugës publike në fjalë, bazuar në profilin e rrugës sipas Planit Zhvillimor Komunal 2016-2024.

4. Këto prona i janë nënshtruar vlerësimit të pronave nga Zyra për Vlerësimin e pronave të paluajtshme pranë Departamentit të tatimit në pronë, në kuadër të Ministrisë së Financave, Punës dhe Transfereve.

5. Pronat e paluajtshme që do të këmben, të përshkruara në pikën 2 të këtij vendimi, duhet të evidentohen në elaboratin kadastral (librat kadastral) të Komunës.

6. Për zbatimin e këtij vendimi obligohen: Drejtorja për Gjeodezi, Kadastër dhe Pronë dhe Drejtorja për Urbanizëm dhe Mbrojtje të Ambientit.

7. Ky vendim hyn në fuqi pesëmbëdhjetë (15) ditë pas regjistrimit në Zyrën e Protokollit të Ministrisë së Administrimit të Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrisë.

3. Shqyrtimi dhe aprovimi i Propozim-vendimit për ndarjen e mirënjohjeve dhe dekoratave për nder të 17 qershorit, ditës së çlirimit.

Ferit Idrizi, kryetar i komunës-sqaroi se, konform rregullores për dekorata e ka themeluar komisioni komunal për hartimin e propozimit për ndarjen e dekoratave, prandaj bazuar në neni 18 të kësaj rregulloreje ku thuhet: Propozimet për dekorata duhet të paraqiten te Komisioni për Shqyrtimin e Propozimeve të tyre me shkrim, së paku 15 ditë para datës në të cilën merret vendimi për ndarje të dekoratës, dhe kështu këto propozime i dërgohen drejtpërdrejtë kuvendit e jo Komitetit për Politikë dhe Financa, nëse ndryshe do të ishte atëherë duhet të ridraftohet kjo rregullore për dekoratat.

Sylejman Meholl, anëtar i kuvendit-tha se, është evident fakti se të gjitha propozimet dhe dokumentet e rëndësishme duhet të kalojnë nëpër filtrin e Komitetit për Politikë dhe Financa, dhe kjo nuk ka ndodhur sa i përket propozimit për dekoratat dhe tani nuk mund të ndalemi në këtë pikë sepse nuk ka kohë për një vonesë të tillë tutje. Pastaj shtoi se, këtij propozimi i mungon lista e mirënjohjeve, andaj do të ishte mirë që këto propozime të bëhen këtu në mbledhje të kuvendit.

Fatmire Cecelia, anëtare e kuvendit-tha se, i vjen mire që propozimi i saj i bërë para disa seancave, që z. Bujar Muli është hy në propozim për çmimin krenaria e sportit, ndërsa propozoi që të futet në propozim për këtë çmim edhe z. Rron Kasumi.

Ali Januzi, anëtar i kuvendit-tha se, është gabim që ne akoma si institucion nuk e kemi një listë me emrat e të burgosurve politikë që nga viti 1981 e tutje, në etapa të ndryshme. Ai propozoi që çmimi nderi i qytetit t'i ndahet z. Ilmi Muzaqit, ish i burgosur politik, që është veprimtar i çështjes kombëtare. Po ashtu, ai propozoi që të dekorohet edhe z. Arsim Gërxfaliu, i cili ka dhënë kontribut të çmuar në fushën e mjekësisë ligjore, me ekspertizën e tij.

Albanez Tahiraj, drejtor i DKA-së, pasi i përshëndeti të pranishmit, në adresimin e tij në cilësinë e kryesuesit të komisionit për hartimin e propozimit për dekorata, deklaroi: duke ju referuar rregullores për dekorata sqaroi se iniciativa për të bërë propozimet për dekorata i takon kryetarit të komunës, Komitetit për Politikë dhe Financa, 1/3 e anëtarëve të kuvendit dhe nismës qytetare në saje të 700 nënshkrimeve. Duke ju referuar po ashtu dispozitave të rregullores citoj se:

Propozimet për dekorata duhet të paraqiten te Komisioni për Shqyrtimin e Propozimeve të tyre me shkrim, së paku 15 ditë para datës në të cilën merret vendimi për ndarje të dekoratës, ndërsa neni vijues përcakton, citoj: Përfundimisht nga paragrafi 7 i këtij neni, në rrethana të arsyeshme që vlerësohet nga komisioni për dekorata se nuk ka qenë e mundur të paraqitet propozimi për dekorata. Ky afat mund të jetë edhe më i shkurtër, por jo më pak se 72 orë nga dita kur merret vendimi lidhur me to. Prandaj, bazuar në dispozitat e cituara, këto organe kanë pasur mundësinë ligjore që bëjnë propozimet e tyre në afat ligjor, duke ia adresuar komisionit e më pas kuvendi do të vendoste për to, me anë të votimit. Meqë këta mekanizma ligjor nuk janë shfrytëzuar, atëherë është lëshuar afati ligjor dhe kësaj propozimet sot në mbledhje të kuvendit nuk mund ti nënshtrohen votimit.

Fatmire Cecelia, anëtare e kuvendit-tha se, kjo pikë e rendit të ditës fare nuk është proceduar në mbledhjen e Komitetit për Politikë dhe Financa dhe kështu komitetit i është pamundësuar që bëjë propozimet për këto çmimet kryesore. Tutje shtoi se, bazuar në 1/3 e anëtarëve të kuvendit duhet të merret për bazë dhe të futet në votim propozimi që z. Arsim Gërxhaliu ti ndahet çmimi “Emblem e Vushtrisë”. Ndërsa propozimi që është ardhur në kuvend për z. Emin Musa, nuk i plotëson kushtet pasi që ai nuk është qytetar i Komunës së Vushtrisë, ndërsa ky çmim ndahet vetëm për qytetarët e Komunës sonë.

Albanez Tahiraj, drejtor i DKA-së-sqaroi se, tani janë shterur të gjitha mundësitë ligjore, për të bërë propozime, sepse janë kaluar afatet ligjore dhe kështu po del se Komitetit për Politikë dhe Financa nuk e ka kryer detyrën e tij që të bëjë propozimet me kohë, andaj komisioni nuk ka mundur të merret me propozime imagjinatave dhe inekzistente.

Sylejman Mehulli, anëtar i kuvendit-tha se, nuk është mirë të tentohet të hedhet përgjegjësia diku tjetër pa pasur asnjë fakt. Ajo që është e vërtetë është fakti se kjo pikë fare nuk ka ardhur në Komitetin për Politikë dhe Financa dhe komiteti nuk ka mundur të bëjë propozim sepse nuk ka pasur fare material. Kjo i bie se komitetit i është pamundësuar t’i bëjë propozimet. Në rastin konkret komisioni për dekorata nuk i ka kryer obligimet që ka pasur që këtë material përmes DKRS-së ta procedoj në Komitetin për Politikë dhe Financa, prandaj komisioni ka dështuar në kryerjen e detyrave që i ka pasur për obligim t’i kryej. Për më tepër komisioni ka sjellë propozime në kundërshtim me rregulloren, sepse çmimi “Nderi i Qytetit” i ndahet qytetarëve të Komunës së Vushtrisë, ndërsa peroni i propozuar është i Komunës së Mitrovicës. Për të mos ardhur në pozicion të palakueshëm mendojmë nëse keni vullnet të shtohet edhe një propozim për çmimin “Emblema e Vushtrri” dhe kësaj të tejkalohet kjo situatë.

Adnan Lahu, anëtar i kuvendit-tha se, të gjitha propozimet që dërgohen në kuvend fillimisht ato duhet të shqyrtohen nga ana e Komitetit për Politikë dhe Financa, meqë një gjë e tillë nuk ka ndodhur, atëherë komitetit i është marr mundësia ligjore që t’i bëjë propozimet e tij të cilat i kanë takuar në saje të rregullores.

Ymer Haradinaj, anëtar i kuvendit-tha se, vitin e kaluar për pos dhjetë mirënjohjeve që i ka ndarë kuvendi i komunës edhe pesë sosh i ka ndarë kryetari i komunës, por i rikujtoj kryetarit të komunës që njëri nga këta është harruar që ti ndahet mirënjohja nga ana e kryetarit të komunës bëhet fjalë për z. Rasim Vatovci, kërkoj që të përmirësohet ky lëshim dhe në bashkëpunim me Drejtorin e Bujqësisë t’i ndahet mirënjohja këtij fermeri, duke e zbatuar vendimin. Në emër të LVV-së propozoi për mirënjohje post-mortum z. Hilmi Haradinaj, i cili ka dhënë një kontribut të çmuar në fushën e arsimit si mësimdhënës dhe drejtor shkolle, por një kohë ka jetuar dhe vepruar në mërgatë ku ka dhënë kontribut të jashtëzakonshëm në arsimin e nxënësve shqiptar në ekzilë.

Faton Hyseni, anëtar i kuvendit-tha se, i përkrah sqarimet që i bëri kryesuesi i komisionit për ndarjen e dekoratave dhe gjykoj se ka qenë afati ligjor kur është dashur të bëhen propozimet e dhe

nga KPF-ja, por një gjë e tillë nuk është shfrytëzuar dhe tani jemi në situatën kur ato duhet të votohen.

Refik Maloku, anëtar i kuvendit-tha se, këtu po tentohet se kush i pari po propozon dhe askush nuk e ka mendje për ta nderuar dikë, por më shumë po luftohet për përfituar secili për veten e tij. Kjo ka bërë të zhytëmi një nivel të ulët ku është degraduar debati, dekorata dhe vetë kuvendi i komunës.

Agron Përçuku, anëtar i kuvendit-tha se, përgjegjësinë kryesore për moskryerjen e obligimeve dhe detyrave është komisioni për dekorata dhe është e padrejtë nga ana e kryesuesit të këtij komisioni që tenton të fajësojë Komitetin për Politikë dhe Financa. Ai apelon që këto propozime të votohen dhe kështu të përmbillet kjo pikë e rendit të ditës.

Albanez Tahiraj, drejtor i DKA-së, duke sqaruar lidhur me rrjedhën e propozimeve dhe punën e komisionit, vlerësoi se dita e çlirimit 17 qershor është dhe festohet për çdo vit, rregullorja për dekorata nuk mjafton vetëm të aprovet, por e njëjta edhe duhet të lexohet dhe të zbatohet nga të gjithë. Pastaj konsideron se nëse propozimet për çmimet kryesore do të vireshin para Komitetit për Politikë dhe Financa, atëherë do të thyhej parimi i konfidencialiteti në raport me qytetarët. Në një logjikë të tillë atëherë do të duhej të thirren qytetarët nga ana e komisionit për të bërë propozimet për këto dekorata.

Ferit Idrizi, kryetar i komunës-tha se, ky debat është duke u stërzgjatur dhe ceku se është e vërtet se ka gabime për sa i përket procedimit të këtij materiali, për faktin se anëtarët e kuvendit është dashur të njoftohen së paku një muaj për këto pika të rendit të ditës. Pastaj, lidhur me çmimin “Emblema e Vushtrisë” ceku se ai e ka bërë këtë propozim duke menduar se z. Emin Musa është qytetar i Komunës së Vushtrrisë. Në këtë kontekst vlerësoi se nuk është qëllim që dikush të përfitoj, por të votohet unanimisht ashtu që këto figura të nderohen dhe jo të shtyhem me vota. Ai konsideron se z. Ilmi Muzaqi është figurë e njohur që ka dhënë për çështjen kombëtare dhe të njëjtit pajtohet se duhet t’i ndahet ky çmim, “Emblema e Vushtrisë”. Më tej, për të qenë krejtësisht transparent, njoftoi se arsye se përse nuk ka sjellë listë të mirënjohjeve është fakti se vitin e kaluar është mbetur pa mirënjohje babi i një dëshmori dhe ai ishte thyer shpirtërisht, dhe më qëllim që mos të vijmë deri te kjo situatë, fare nuk ka sjellë një listë të tillë.

Në fund të debatit lidhur me këtë pikë të rendit të ditës, kuvendi pas votimit me vota “unanime” vendosi me sa vijon:

1. Me këtë vendim, në rastin e shënimit të “Ditës së Çlirimit të Vushtrisë”, me titullin “**Qytetar nderi**” i Komunës së Vushtrrisë nderohet **Çifti Buçinca znj. Naxhije dhe (z.Fahri Buçinca post-mortum)**, për kontributin e tyre të dhënë për Komunën e Vushtrrisë në fushën e arsimit dhe kulturës.
2. Dorëzimi i këtij titull do të bëhet nga Kryetari i komunës më datë 17 qershor - “Ditën e Çlirimit të Vushtrisë”.
3. Për zbatimin e këtij vendimi obligohen: Kryetari i komunës, Drejtorja për Kulturë, Rini dhe Sport, dhe Drejtorja për Buxhet dhe Financa.
4. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrrisë.

1. Me këtë vendim, në rastin e shënimit të “Ditës së Çlirimit të Vushtrisë”, me titull **“Nderi i qytetit”** i Komunës së Vushtrisë, nderohet **znj. Dinore Curri**, për kontributin e dhënë për çështjen kombëtare, organizatore e demonstratave të vitit 1982 në Vushtri, e burgosur për veprimtari politike dhe pjesëtare e luftës së fundit të UÇK-së.

2. Dorëzimi i këtyre dekoratave (titujve) do të bëhet nga Kryetari i Komunës, më datë 17 qershor-“Ditën e Çlirimit të Vushtrisë”.

3. Për zbatimin e këtij vendimi obligohen: Kryetari i komunës, Drejtoria për Kulturë, Rini dhe Sport, dhe Drejtoria për Buxhet dhe Financa.

4. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrisë.

1. Me këtë vendim në rastin e shënimit të “Ditës së Çlirimit të Vushtrisë”, me çmimin **“Emblema e Vushtrisë”**, për kontributin e dhënë për çështjen kombëtare nderohen;

1.1. z. Emin Musa, për kontributin e dhënë për çështjen kombëtare si ish-epror i lartë i UÇK-së, TMK-së dhe FSK-së;

1.2. z. Ilmi Muzaqi, për kontributin e dhënë për çështjen kombëtare, organizator i demonstratave të viti 1981, ish i burgosur politik.

2. Dekoratat nga pika një (1) e këtij vendimi do t’i dorëzoi Kryetari i komunës në ditën e shënimit të kësaj date, më 17 qershor 2024.

3. Për zbatimin e këtij vendimi obligohen: Zyra e Kryetarit, Drejtoria për Buxhet dhe Financa dhe Drejtoria për Kulturë, Rini dhe Sport.

4. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrisë.

1. Me këtë vendim në rastin e shënimit të “Ditës së Çlirimit të Vushtrisë”, me çmimin **“Krenaria e Sportit të Vushtrisë”** nderohet **z. Bujar Muli**, për të arriturat e tij në sportin e peshë-mbajtjes si rekordmen në peshëmbajtje të rënd prej 1531 kg mbi trup, i cili ka hyrë në librin e guinness si njeriu më i fortë në botë.

2. Dorëzimi i këtij çmimi bëhet në mënyrë solemne nga Kryetari i Komunës së Vushtrisë, në ditën e shënimit të kësaj date, më 17 qershor 2024.

3. Për zbatimin e këtij vendimi obligohen: Zyra e Kryetarit, Drejtoria për Kulturë, Rini dhe Sport, dhe Drejtoria për Buxhet dhe Financa.

4. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrisë.

Lidhur me propozim-vendimin për ndarjen e mirënjohjeve për nder të 17 qershorit ditës së çlirimit, kuvendi pas votimit me 26 vota “për”, 2 vota “abstenim”, vendosi me sa vijon:

1. Me këtë vendim, Kuvendi i komunës për nder të “Ditës së Çlirimit të Vushtrrisë”, më 17 qershor ndanë këto mirënjohje:

- 1.1. Man Hoti - (post mortum), për kontributin e dhënë për çështjen kombëtare, pjesëmarrës dhe organizator i demonstratave të vitit 1981, ish i burgosur politik;
- 1.2. Lavdim Shaqiri – (post mortum), i vrarë nga forcat pushtuese serbe- Martir i Kosovës;
- 1.3. Hilmi Haradinaj – (post mortum), për kontributin e dhënë në fushën e arsimit, mësimdhënës dhe ish-drejtor shkolle;
- 1.4. Ferki Përçuku – për kontributin e dhënë në fushën e arsimit, veteran i arsimit dhe ish-drejtor shkolle;
- 1.5. Hamdi Kasumi, veteran i arsimit, i cili dha një kontribut të çmuar në fushën e arsimit, ish-drejtor shkolle;
- 1.6. Brahim Maxhuni, për kontributin e dhënë në fushën e shëndetësisë, gjegjësisht në lëmin e Otorinolaringologjisë;
- 1.7. Ferdane Pllana – Zabërgja, për kontributin e dhënë në fushën e letërsisë;
- 1.8. Shkelzen Syla – (post mortum), për kontributin e dhënë në luftën fundit dhe kontribut të çmuar në Policinë e Kosovës;
- 1.9. Gëzim Behrami, për kontributin e dhënë në fushën e sportit, Kampion në Kik-boks;
- 1.10. Zeqir Morina, për kontributin e dhënë për çlirimin e Kosovës, ish-pjesëtar i UÇK-së.

2. Për zbatimin e këtij vendimi obligohen: Zyra e Kryetarit të Komunës, Drejtoria për Kulturë, Rini dhe Sport dhe drejtoritë e tjera kompetente komunale.

3. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrrisë.

4. *Shqyrtimi i Raportit vjetor për punën e Ndërmarrjes Regjionale të Mbeturinave KRM “Uniteti” për vitin 2024.*

Bekim Zabërgja, anëtar i kuvendit-pasi i përshëndeti gjithë të pranishmit tha se, para veti kemi një informatë apo raport, i cili as për së afërmi nuk i plotëson kriteret bazë që i parasheh Ligji për Ndërmarrjet Publike, dhe mund të thuhet se është një raport apo informatë skandaloze, sepse janë paraqit tri apo katër elemente shumë të parëndësishme, ku është përshkruar sa biznese janë pasive sa janë aktive, sa kamion me mbeturina janë bartë, ndërsa sa i përket aspektit financiar as edhe një element i vetëm. Andaj duke ju referuar Ligjit për Ndërmarrjet Publike neni 30, citoj: *Deri me 31*

tetor të çdo viti kalendarik, zyrtarët e secilës NP duhet të përgatisin Planin e Biznesit për vitin e ardhshëm kalendarik. Ky plan duhet që së pari ti dorëzohet për miratim Bordit të Drejtorëve. Pas miratimit, Plani Afarist i dorëzohet, për qëllime të informimit vetëm, sipas rastit, Ministrit dhe Qeverisë ose Komisionit (eve) përkatëse Komunale të Aksionarëve. Plani Afarist duhet të analizojë së paku, si vijon: një përshkrim të synimeve afariste dhe financiare të cilat synohen të arrihen nga NP si dhe orarin për realizimin e tyre; b) mënyrat e zgjedhura për arritjen e këtyre synimeve; c) përcaktimin e shpenzimeve të përgjithshme për ushtrimin e veprimtarisë si dhe mënyrës për financimin e shpenzimeve; d) veprimet të cilat duhet të ndërmerren për arritjen e synimeve; dhe detyrimet e NP karshi konsumatorëve dhe publikut.

Prandaj pyetja e tij ishte sa ka qenë vlera financiare e planit të biznesit për vitin kalendarik 2023, cili ka qenë përshkrimi i synimeve afariste dhe financiare të cilat synohen të arrihen në ndërmarrjen publike si dhe orarin për realizimin e tyre, mënyrat e zgjedhur për arritjen e këtyre synimeve, përcaktimi i shpenzimeve të përgjithshme për ushtrimin e veprimtarisë si dhe mënyrën e financimit të shpenzimeve, veprimet të cilat duhet të ndërmerren për arritjen e synimeve dhe mbulimi i detyrimeve të ndërmarrjes publike karshi konsumatorit dhe publikut, brenda 30 ditëve pas përfundimit të çdo tre mujori kalendarik, zyrtarët e ndërmarrjes publike përgatisin dhe dorëzojnë në bordin e drejtorëve një raport të sapo përfunduar, ndërsa bordi i drejtorëve brenda 30 ditëve pas pranimit të raportit tremujor secilin raport të tillë ja paraqet Komisionit të Aksionarëve. Prandaj pyeti se ku janë raportet e tremujorit të parë, dytë dhe tretë apo raporti nëntë mujor. Çdo ndërmarrje publike e ka për obligim ligjor t'i nënshtrohet një auditimi të jashtëm vjetor dhe objektiv, nga një auditor i pavarur, kompetent dhe i kualifikuar, dhe pyeti ku është dokumenti bazë i auditimit të jashtëm që nuk është paraqitur në këtë dokument. Raporti për përmbushjen e nevojave tjera të ndërmarrjes publike me përgjegjësi të kryeshefit ekzekutiv rregullisht duhet të testoj kënaqësinë e konsumatorëve për shërbimet që i ofron ndërmarrja, pyetja është se ku është ky raport që tregon kënaqësinë e konsumatorëve. Vlerësimi i efektshmërisë së bordit, sepse bordi i drejtorëve në baza vjetore bënë vlerësimin sistematik të performancës së vetë dhe është i obliguar të hartoj raportin dhe më pas ky raport i dorëzohet komisionit të aksionarëve por që një raport nuk ekziston fare. Të gjitha ndërmarrjet përgatisin dhe vejnë në fuqi rregulloret të cilat bëhen konform Ligjit për Shoqëritë Tregtare, ku miratimi, ndryshimi, plotësimi dhe shfuqizimi i tyre është kompetencë ekskluzive e Komisionit Komunal të Aksionarëve, pyetja për komisionin është se cilat rregullore i keni miratuar, ndryshuar, plotësuar apo shfuqizuar. Mbledhje e Komisionit të Aksionarëve për vitin paraprak sa mbledhje ka mbajtur komisioni, në ato mbledhje çfarë është rekomanduar bordit, ku janë procesverbalet e atyre mbledhjeve, nëse keni bërë rekomandime a janë përfillur ato rekomandime nga ana e bordit, për faktin se komisioni në ligjërisht në mënyrë rigorozë e mbikëqyr bordin e drejtorëve, sikurse që bordi e mbikëqyr kryeshefin ekzekutiv. Në fund lidhur me bilancin përfundimtar, të hyrat dhe shpenzimet, a ka operuar me sukses dhe bilanc pozitiv apo negativ ndërmarrja, nëse ka operuar me afarizëm financiar pozitiv sa është vlera e dividendës të ardhurat nga kapitale aksionar-financiar, nëse anëtar i komisionit të aksionarëve është në gjendje të përgjigjet, nëse jo ai propozoi që kjo pikë e rendit të ditës të shtyhet në mbledhjen tjetër të paraqitën të gjitha këto vërejtje në raport, nëse sot votohet kërkoj nga sekretaria e kuvendit që vota e tij të konstatohet se është votë kundër këtij raporti.

Sylejman Mehulli, anëtar i kuvendit-duke ju referuar raportit të KRM. “Uniteti” vlerësoi se, është mirë që prezent është edhe kryeshefi ekzekutiv i kësaj ndërmarrje, për të raportuar mbi gjendjen financiare të kësaj ndërmarrje, për më tepër për proceset që kanë ndodhur në këtë kompani, siç e dimë Komuna e Vushtrrisë si njëra ndër aksionarët në këtë ndërmarrje me vendim individual i ka kaluar shumicën e shërbimeve i ka kaluar në N.P.L “Përparimi” dhe ne si kuvendar

por edhe qytetarë e Komunës së Vushtrisë nuk e kemi një pasqyrë të qartë lidhur me kalimin e këtyre kompetencave në kuadër të N.P.L “Përparimi” dhe nuk e dimë as situatën e borxheve financiare sepse deri sa këto shërbime i ka kryer kompania “Uniteti” mjetet i janë paguar kësaj kompanie dhe ne duhet të dimë se cili është bilanci i borxheve, a ka pasur prerje të këtyre borxheve dhe barazim të saldoeve të pasives dhe aktives në rastin e ndërrimit të pronësisë së shërbimeve nga Kompania “Uniteti” tek ajo “Përparimi”. Duhet të kemi një pasqyrë të përgjithshme lidhur me gjendjen e aseteve që janë pjesë e aksioneve të kësaj kompanie e në të cilat bënë pjesë edhe Komuna e Vushtrisë.

Adnan Lahu, anëtar i kuvendit-tha se, ky raport-dokument është shumë i mangët dhe kërkoj nga komisionit i aksionarëve i kësaj ndërmarrje që të sjellë një raport konform kushteve që i kërkon ligji. Pastaj shtoi se, duhet të dihet se çfarë ka ndodhur me makinerinë punese të kësaj ndërmarrje, që i ka fituar komuna si donacione nga performanca e të cilat i ka bartur në shfrytëzim të Kompanisë “Uniteti”, sepse ne aktualisht jemi duke paguar mjete për Përparimin, për blerjen e makinerisë, në ndërkohë që këto mjete do të mund të shfrytëzoheshin nga ana e kompanisë “Përparimi”.

Ymer Haradinaj, anëtar i kuvendit-tha se, ky raport-dokument është shumë i mangët dhe shtoi se do të ishte mirë që kuvendi të kishte informacione bazike të përgjithshme lidhur me gjendje e kësaj kompanie duke përfshirë edhe strukturën udhëheqëse të saj. Pastaj, përsëriti kërkesën e tij për nevojën urgjente për eliminimin e një deponie të mbeturinave në fshatin Stanoc i Epërm, sepse e njëjta po shkakton pengesa për fermerët për t’i punuar tokat e tyre. Kërkoj që urgjentisht të merren masat adekuate nga organet kompetente, për eliminimin e kësaj deponie.

Jeton Gjaka, anëtar i kuvendit-kërkoj nga strukturat menaxhuese të japin një raport detal lidhur me gjendjen aktuale ekonomiko-financiare të kësaj ndërmarrje por edhe për sa i përket rritjes së pagave për punëtorët e saj.

Gazmend Morina, kryeshef ekzekutiv i KRM “Unitetit”-paraqiti sqarime të përgjithshme lidhur me gjendjen e kompanisë “Uniteti” duke cekur se Komuna e Vushtrisë ka disa obligime financiare ndaj kësaj kompanie të cilat duhet ti përmbush, në të kundërtën kompania është e shtyrë të shfrytëzoj mjetet tjera ligjore, përmes gjykatës për realizmin e këtyre borxheve.

Konkluzioni i debati: obligohet Komisioni i Aksionarëve dhe menaxhmenti i Kompanisë “Uniteti” që ta plotësoj raportin sipas vërejtjeve të anëtarëve të kuvendit.

5. Shqyrtimi dhe aprovimi i kërkesës së Shoqatës së Familjeve të Dëshmorëve të UÇK-së – dega në Vushtri.

Isuf Jashari, drejtor i DBF-së-paraqiti sqarime lidhur me kërkesën e Shoqatës së Familjeve të Dëshmorëve të UÇK-së – dega në Vushtri, për ndarjen e mjeteve për ngritjen e një lapidari për dëshmorin Mehdi Haziri, ku ceku se shuma që do të dedikohet për këtë qellim mund të jetë deri në 2000 €.

Sylejman Mehulli, anëtar i kuvendit-tha se, si grup kuvendar do ta përkrahin këtë kërkesë, për financimin e këtij projekti dhe përherë do të jenë në mbështetje të familjeve dhe dëshmorëve të kombit sepse vetëm ata e kanë kryer misionin ndaj atdheut. Ai dha idenë që për lapidarët që do të ndërtohen në të ardhmen këto projekte të futen në buxhetin e komunës kur ai aprovohet dhe kështu të lehtësohen procedurat për realizmin e këtyre projekteve, duke ndërtuar nga një apo dy lapidarë për çdo vit buxhetor. Kjo do ishte më mirë dhe kuvendi nuk do të sfidohej në këtë formë dhe kjo do të ishte një nderim i mirëfilltë për dëshmorët e kombit.

Adnan Lahu, anëtar i kuvendit- tha se, si grup kuvendar do ta përkrahin këtë kërkesë dhe kërkoj që shuma e këtyre mjeteve varësisht nga mundësia të ngritet, pasi që vlera e këtij projekti është rreth 6000 €.

Ymer Haradinaj, anëtar i kuvendit-tha se, kjo kërkesë është e arsyeshme pasi që familja e veç e ka përfunduar këtë lapidar për heroin e UÇK-së, prandaj do të ishte mirë që të ndihmohet kjo familje duke e rritur vlerën e kësaj kërkesë, duke e realizuar plotësisht këtë kërkesë në vlerë prej 6000€.

Në fund të debatit lidhur me këtë pikë të rendit të ditës, kuvendi, pas votimit me vota “unanime” vendosi me sa vijon:

1. Me këtë vendim z. Behar Haziri, i ofrohet mbështetje financiare në shumë prej dymijë euro (2000.00 €) për financimin e ndërtimit të lapidarit për Dëshmorin e UÇK-së Mehdi (Sylë) Haziri, Zona Operative e Shalës, Brigada 142.
2. Mjetet financiare të cekura në pikën paraprake të këtij vendimi do të sigurohen nga buxheti i komunës – kategoria: subvencione dhe transfere, **Programi Buxhetor (16024)-zyra e kryetarit.**
3. Për zbatimin e këtij vendimi obligohen: Drejtoria për Buxhet dhe Financa dhe Zyra e Kryetarit të Komunës.
4. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.
6. Shqyrtimi dhe aprovimi i Propozim – vendimit për formimin e komisionit për shqyrtimin e ankesave lidhur me dhënien e pronës komunale në shfrytëzim.

Bekim Zabergja, anëtar i kuvendit-kërkoj sqarim se në cilin ligj përcaktohet se duhet të vendosen emrat e subjekteve politike në propozim-vendim. Po ashtu ky propozim-vendim ka edhe një gabim në thirrjen juridike.

Sylejman Mehulli, anëtar i kuvendit-tha se, e konteston çelësin e themelimit të këtij komisioni dhe shtoj se atyre si grup i madh kuvendar iu takon të kenë një anëtar në këtë komision. Gjithashtu ai vlerësoi se edhe profilet e propozuar për këtë komision nuk janë adekuate sepse vinë nga fusha që i takon shqyrtimit të ankesave për pronën. Për anëtar të këtij komisioni propozoi z.Ymer Haradinaj.

Adnan Lahu, anëtar i kuvendit-tha se, caktimi i subjekteve politike është sigurisht ndonjë gabim teknik, por ky propozim-vendim është i hartuar konform legjislacionit në fuqi.

Ymer Haradinaj, anëtar i kuvendit-vlerësoi se, me që komisioni për dhënien e pronës në shfrytëzim është theluar nga anëtarët e PDK-së dhe LDK-së, komisioni për shqyrtimin e ankesave për dhënie e pronës në shfrytëzim duhet të themelohet nga anëtarët e subjekteve tjera politike, sepse kjo është më e shëndetshme për demokracinë.

Mentor Hasani, anëtar i kuvendit-propozoi Kushtim Hyseni-n për anëtar të këtij komisioni, nga radhët e PDK-së.

Edona Gashi, anëtare e kuvendit-propozoi Adnan Lahu-n për anëtar të këtij komisioni, nga radhët e LDK-së.

Në vazhdim kryesuesja e kuvendit propozimet për anëtarë të këtij komisionit nga radhët e subjekteve politike i hodhi në votim në mënyrë individuale për secilin propozim dhe atë me sa vijon:

Kushtim Hyseni mori 15 vota “për”

Adnan Lahu mori 6 vota “për”

Ymer Haradinaj mori 7 vota “për”

Në fund të debatit lidhur me këtë pikë të rendit të ditës, kuvendi, pas votimit me 21 vota “për” vendosi me sa vijon:

1. Me këtë vendim, formohet komisioni për shqyrtim të ankesave në procedurën e dhënies në shfrytëzim të pronës së paluajtshme të komunës, në këtë përbërje:

- 1.1 Kushtrim Hyseni, anëtar i kuvendit;**
- 1.2 Ymer Haradinaj, anëtar i kuvendit;**
- 1.3 Maliq Ferizi, anëtar i ekzekutivit;**
- 1.4 Hyra Uka-Hoxha, anëtare e ekzekutivit;**
- 1.5 Blerim Ibrahim, anëtar i shoqërisë civile.**

2. Mandati i komisionit është dyvjeçarë, brenda mandatit të tanishëm të anëtarëve të Kuvendit të Komunës.

3. Anëtarët e komisionit me shumicë të votave zgjedhin kryesuesin e komisionit, i cili kryeson punën e komisionit.

4. Komisioni në përbërje të cekur si në pikën 1 (një) të këtij vendimi, përgjegjësitë dhe kompetencat do t'i ushtrojë në pajtim me dispozitat e Ligjit nr. 06/L-092, për Dhënien në Shfrytëzim dhe Këmbim të Pronës së Paluajtshme të Komunës dhe Rregullores së QRK, Nr.09/2020, për Përcaktimin e Procedurave të Dhënies në Shfrytëzim dhe Këmbim të Pronës së Paluajtshme të Komunës.

5. Për zbatimin e këtij vendimi obligohen: anëtarët e komisionit të cekur në pikën 1 (një) të këtij vendimi.

6. Ky vendim hyn në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe pas publikimit në faqen zyrtare të Komunës së Vushtrisë.

7. Shqyrtimi dhe aprovimi i Propozim – vendimit për pagesën e shujtave ditore për zyrtarë të administratës së komunës.

Sylejman Mehulli, anëtar i kuvendit-lidhur me Propozim – vendimit për pagesën e shujtave ditore për zyrtarë të administratës së komunës, vlerësoi se, për këtë çështje duhet të jemi transparent dhe për më tepër kryetari i komunës duhet të jetë i sqertë, me propozimet që i jep për shujtat ditore për zyrtarë të administratës së komunës. Kur është votuar ky propozim në herën e

parë i kishte dhënë vërejtjet e tij dhe ato vërejtje kanë dal të jenë të sakta, pas disa muajsh kur nuk ishte ekzekutuar dhe nxjerr ky vendim, tani është sjellë sërish ky propozim-vendim, por pikërisht në këto momente kryetari i komunës largohet nga mbledhja dhe kjo tregon joshinjeritet nga ana e tij. Ai kërkoi që para se të votohet ky propozim të sqarohet si për opinionin publik ashtu edhe për zyrtarët që do të jenë përfitues i kësaj shujte, se nga cila kategori ekonomike ku do të merren mjetet, a po ashtu cilët janë ata zyrtarë që do të përfitojnë nga ky vendim, a do të përfitojnë të gjithë të punësuarit si nga fusha e arsimit, nga shëndetësia, në kulturë në administratë e komunës në Qendrën e Mjekësisë Familjare, zyrtarët e Qendrës për Punës Sociale, në Ndërmarrjen Lokale Përparimi e kështu më radhë, pra duhet të specifikohet dhe të dihet saktë se cilat kategori do të përfitojnë nga ky vendim i kuvendit. Kjo për faktin se me një vendim të tillë të pa sqaruar mirë, ne jemi ka rrezikojmë komunën dhe stabilitetin financiar të saj, sepse këta zyrtar me anë të padive gjyqësore nga cilido sektor i komunës të kërkoj kompensimin e këtyre mjeteve. Andaj kjo është një çështje shumë serioze dhe ky nuk është një vendim vetëm ad-hoc sa për tu aprovuar, pa e ditur saktë se cilat kategori të të punësuarve do të futen në kuadër të këtij vendimi për ti gëzuar këto benefite. Si grup kuvendar i LVV-së propozojnë që mos të ketë dallime, mos të ketë ndasi në mes të punësuarve që të ju paguhet ky kompensim. Por ne jemi dëshmitar se ndasitë për këtë çështje kanë filluar akoma para se ky vendim të aprovohet, sepse kryetari i komunës i ka thirrur punëtorët e Ndërmarrjes “Përparimi” në një drekë dhe iu ka premtuar se do të iu kompensoj shujtat atyre. Kjo qasje është e pa sinqertë dhe krijon ndarje dhe përçarje. Edhe njëherë përsërit se duhet të përcaktohet dhe të dihet saktë se kujt do të iu jepet kjo shujtë cilëve zyrtarë. Prandaj është mirë që Drejtoria e Administratës si hartues i këtij propozim-vendimi të jap sqarimet e duhura se çfarë është menduar me këto kategori, sepse nëse e lëshojmë këtë çështje si të pasqaruar, punëtorë që llogariten si punëtorë të Komunës së Vushtrrisë, të çdo sektori, do ta krijojnë një alibi juridike se si kanë vepruar mësimdhënësit me anë të kontratës kolektive, që do ta padisin komunën pas disa viteve duke kërkuar kompensimin për çdo muaj dhe pasojat do t’i bartë komuna në vitet vijuese. Andaj krejt në fund vlerësoj dhe apeloj që mos të votojmë këtë vendim pa e sqaruar saktë cilat kategori janë përfitues, si grup kuvendar i LVV-së, e mbështesin këtë pikë që shujta të ndahet në mënyrë lineare dhe pa asnjë dallim.

Isuf Jashari, drejtor i DBF-së- sqaroi se, ajo se çfarë do të ishte në rregull është se planifikimi i këtyre shujtave do të duhej që ato të futen në buxhetin e komunës në kohën e aprovimi të buxhetit vjetor të komunës dhe atë nga kategoria ekonomike paga dhe mëditje. Por ajo që paraqet problem, se nga niveli qendror i pushtetit nuk po lejohet hapja e një kodi buxhetor ku do të mund të planifikoheshin këto shujta. Tutje sqaroi se, përfitues të këtyre shujtave janë vetëm shërbyesit civil të administratës së komunës, por jo ata nga fusha e arsimit dhe ajo e shëndetësisë, sepse ata kanë tjetër status ligjor dhe të njëjtit kanë përfituar nga aktet tjera siç është kontrata kolektive. Ai propozoi që kjo çështje të shtyhet për mbledhjen e ardhshme ashtu që kjo çështje të sqarohet krejtësisht, sepse është e ndjeshme dhe nëse mendohet të futen edhe kategoria e arsimit dhe ajo e shëndetësisë, atëherë ky vendim do të ketë kosto të papërbalueshme financiare.

Sylejman Mehulli, anëtar i kuvendit-tha se, janë tri komponente që bëjnë këtë çështje shumë të diskutueshme dhe këtë vendim të paqëndrueshëm dhe ato janë e para se a lejon hapësirë Ligji i Pagave për pagesën e shujtave, mandej a lejohet zbatimi i këtij vendim nga kategoria subvencione dhe transfere dhe e treta nuk po dihet se kush është përfitues i këtyre shujtave cilat kategori. Pastaj nëse kjo çështje do të trajtohet me seriozitet do të mund të vendosej kjo shujtë në saje të koeficienteve të pagave, dhe kjo do të krijojë një drejtëshmëri në aspektin e ndarjes së këtyre shujtave dhe do ta lehtësonte barrën financiare për komunën. Tutje ai vlerësoi se më këtë çështje

është manipuluar dhe po tentohet të mashtrohen punëtorët e komunës, dhe me këtë kategori është duke u luajtur me ndjenjat e tyre, duke i thyer ata shpirtërisht.

Melihate Basholli-Latifi, Kryesuese e Kuvendit- tha se, kjo çështje është e qartë dhe pastër si kristal, se bëhet fjalë vetëm për punëtorët e komunës, shërbyesit civil në administratën e komunës që do të përfitojnë nga ky vendim, shujtat ditore.

Adnan Lahu, anëtar i kuvendit- tha se, këtij propozim-vendimi është dashur ti bashkëngjitet edhe shkresa e MAPL-së, lidhur vlerësimet që ata i kanë dhënë, nëse veç jemi te kjo, atëherë ky propozim është dashur të filtrohet edhe nga ana e Komitetit për Politikë dhe Financa. Tutje nga sqarimet e bëra nga Drejtori i Drejtorisë së Financave, shihet se ky vendim do ti përfshijë vetëm punëtorët e administratës së komunës. Si grup kuvendar i LDK-së do ta përkrahin këtë pikë, por problemi kryesor do të jetë zbatimi në praktikë i këtij vendimi.

Mentor Ferizi, anëtar i kuvendit-tha se, nga ky vendim do të përfitojnë vetëm shërbyesit civil të administratës së komunës, sepse ata nga fusha e arsimit janë anëtarë të SBASHKUT dhe përfitojnë nga kontrata kolektive, ku edhe i kanë marrë benficionet e tyre në rrugë gjyqësore.

Jeton Gjaka, anëtar i kuvendit-tha se, kjo çështje është mirë sqarohet para se të aprovohet ky vendim, se cilat kategori do të jenë përfituese të këtyre shujtave.

Melihate Basholli-Latifi, Kryesuese e Kuvendit-në rekapitullimin e debatit lidhur me këtë pikë të rendit të ditës, konstatoj se nga ky vendim do të përfitojnë vetëm shërbyesit civil të administratës së komunës.

Në fund të debatit lidhur me këtë pikë të rendit të ditës, kuvendit pas votimit me 28 vota “për”, sa edhe ishin prezent në sallën e mbledhjes, vendosi me sa vijon:

1. Me këtë vendim, lejohet pagesa e shujtave në vlerë prej 3.00 € (tri euro) në ditë pune, për zyrtarë të punësuar në Administratën e Komunës së Vushtrrisë.

2. Mjetet financiare nga pika paraprake e këtij vendimi do të sigurohen nga kategoria ekonomike subvencione dhe transfere nga programet si në vijim: zyra e kryetarit- kodi buxhetor 16024, Shërbime Publike- kodi buxhetor 18184, Bujqësia- kodi buxhetor 47024, Kultura- kodi buxhetor 85024, Arsimi dhe shkencë- kodi buxhetor 92120, Shëndetësia dhe Mirëqenia Sociale- kodi buxhetor 73033, në shumë prej 240,000.00€ (dyqind e katërdhjetë mijë euro).

3. Për zbatimin e këtij vendimi do të kujdeset: Kryetari Komunës, Drejtorja për Buxhet e Financa, Drejtorja e Administratës dhe Zyra e Personelit.

4. Ky vendim hyn në fuqi pesëmbëdhjetë (15) ditë pas regjistrimit në zyrën e Protokollit në Ministrinë e Administrimit të Pushtetit Lokal si dhe shtatë (7) ditë pas publikimit në faqen zyrtare të Komunës së Vushtrrisë, dhe do të zbatohet nga data 03.01.2024.

8. Shqyrtimi i Informatës lidhur me Qarkoren Buxhetore Nr.01/2025.

9. Pyetje dhe përgjigje:


Ymer Haradinaj, anëtar i kuvendit-pyeti kryetarin e komunës se kur do të bëhet pagesa e subvencionit për fermerët e komunës sonë në vlerë prej 05 cent për litër të qumështit, për gjashtëmujorin e dytë të vitit 2023? Pyetja tjetër ishte deri ku ka shkuar procesi për ofrimin e

ndihmës financiare për bizneset që shtrihen në sheshin “Adem Jashari”, ku po ndërtohet parkingu nëntokësor e në ç’ rast nga punimet janë dëmtuar këto biznese në ushtrimin e veprimtarisë së tyre? Pastaj pyeti kryetarin e komunës se a ka plan konkret për mbrojtjen e qytetarëve nga qentë endacakë, të cilët janë të rrezikua e sidomos nxënësit e shkollave fillore, ai përmendi një rast ku një qenë endacak për çdo ditë i sulmon nxënësit e shkollës fillore “Migjeni” në fshatin Stanoc i Epërm. Po ashtu pyeti kryetarin e komunës se deri ku ka shkuar procesi i marrëveshjes mes komunës dhe Kompanisë “Emona”, për pronën në fshatin Gracë, ku kuvendi ka marrë vendim për autorizimin e kryetarit të komunës për kthimin e asaj prone për nevojat e komunës, kthimin në pronësi komunale? Mandej paraqiti dy kërkesa, njëra që ka të bëjë me një kanalizim mes lagjeve: Haradinaj, Pronaj dhe Maloku, ku gjendet një fermë e cila nuk ka kanalizim dhe kemi kundërmim të rrezikshëm që paraqet problem për banorët e lagjeve Pronaj dhe Maloku, e po ashtu kemi edhe ankesë për këtë çështje në Drejtorinë e Inspektimeve, andaj kërkoi që me urgjencë organet komunale të merren me zgjidhjen e kësaj problematike. Dhe kërkesa e fundit është për rregullimin e ndriçimit publik i cili është prishur që disa muaj në fshatin Stanoc i Epërm, respektivisht në rrugën “Skender Bllaca”.

Ferit Idrizi, kryetar i komunës-ai sqaroi dhe kërkoi falje për mungesën e tij në një pjesë të mbledhjes së kuvendit, por ishte në një takim me Kryetarin e Komunës së Mamushës, por mbledhja e kuvendit ishte shtyrë pikërisht me kërkesën e tij për ditën e hënë që të jetë prezent në mbledhje. Pastaj, duke u përgjigjur në pyetjet e anëtarit të kuvendit, sqaroi se pagesa subvencioneve për qumështin nuk është bërë sepse akoma nuk janë transferuar mjetet nga të hyrat e bartura, por mendon se shumë shpejt ato do të ekzekutohen dhe fermerët do t’i marrin këto mjete. Lidhur me rimbursimin për bizneset në sheshin “Adem Jashari” njoftoi se pa përfunduar projekti i parkingut nëntokësor nuk mund të bëhet pagesa sepse nuk e dimë akoma se sa është e gjatë perioda për të cilën do të kompensohen, por, sigurisht se ato biznese do të kompensohen. Pastaj lidhur me problemin e qeneve endacak vlerësoi se ky është bërë problem nacional dhe mendon që të gjendet një zgjidhje e përgjithshme, në nivel vendi. Në këtë kontekst njoftoi se në bashkëpunim me veterinarët dhe një organizatë zvicerane përmes një tenderi mendon të gjen një zgjidhje. Mandej, lidhur me rregullimin e ndriçimit publik, ceku se duhet të njoftohet kompania “Përparimi” dhe ky problem zgjidhet. Sa i përket kanalizimit në fshatin Stanoc i Epërm, njoftoi se komuna ka kontratë dhe do të evitohet ai problem atje.

Mbledhja përfundoi në ora 13:40

Bastri Duraku



Procesmbajtës

Melihate Basholli-Latifi



Kryesuese e Kuvendit